

吾能召致此非狂者之言乎黃喜啓曰一可學雖顛狂其從之者豈盡然乎上謂鞠獄官曰今以可學之故無罪之人被囚者多宜速分辨○下前直藝文館李逖內膳少尹劉直成均學諭楊秩子巡禁司獄可學辭引直又巡禁司司直朴楣初捕可學之時逖薦亡母設水陸齋于白州之西山寺可學素與逖交方在其寺故并囚逖秩則任聘之友臂也按驗無實尋皆釋之○下上黨君李佇開城留後姜思德前東北面都巡問使呂稱檢校叅贊議政府事吳嗣宗李沃承寧府少尹金邁卿等六人于巡禁司以辭連可學也翼日皆釋之○壬申慶尚道赤稷○癸酉議政府定收煙戶米之法以聞京中見任一二品為上戶出米十斗三四品為中戶出六斗五六品為下戶出四斗叅外為下下戶出二斗庶人出一斗前衙各品各減其半外方則有田十五結男女十五口以上為上戶田十結男女十口以上為中戶田五結男女五口以上為下戶田一二結男女一二口為不成戶并三戶為一戶依京中三等例出米有差田二十結